

10 DEC 1997

Mahathir-tilawah

UMAT ISLAM PERLU PROAKTIF, KATA DR MAHATHIR

KUALA LUMPUR, 10 Dis (Bernama) -- Perdana Menteri, Datuk Seri Dr Mahathir Mohamad berkata umat Islam tidak seharusnya mempunyai sikap negatif sebaliknya perlu berpendirian proaktif dengan menggunakan sepenuhnya segala peluang daripada kemajuan sains dan teknologi.

Beliau berkata ledakan teknologi maklumat dan kemajuan multimedia di seluruh dunia seharusnya diterima secara positif.

"Islam dan pengikutnya boleh mendapat banyak faedah sekiranya mereka bijak menggunakan kemajuan teknologi maklumat dan multimedia untuk faedah diri, katanya dalam buku cenderamata sempena Majlis Tilawah Al-Quran Antarabangsa ke-39 di sini.

Yang di-Pertuan Agong Tuanku Ja'afar merasmikan majlis tilawah yang membawa tema "Akhlak Mulia Menjamin Keamanan Ummah" di Pusat Dagangan Dunia Putra (PWTC) di sini malam ini.

Turut hadir Raja Permaisuri Agong, Tuanku Najihah, Timbalan Perdana Menteri Datuk Seri Anwar Ibrahim dan isteri Datin Seri Dr Wan Azizah Wan Ismail.

Sebanyak 37 peserta dari 23 buah negara termasuk Malaysia mengambil bahagian dalam tilawah enam hari itu. Tiga peserta, masing-masing dari Filipina, Surinam dan Kemboja memperdengarkan bacaan masing-masing pada malam pertama.

Dr Mahathir, yang kini menghadiri sidang kemuncak Pertubuhan Persidangan Islam (OIC) di Tehran, Iran berkata usaha perlu dilakukan bagi memastikan umat Islam tidak kehilangan nilai-nilai murni yang diamalkan sejak turun-temurun.

Dengan mengamalkan akhlak mulia sepanjang masa, umat Islam tidak akan terpengaruh dengan budaya negatif yang boleh melemahkan kekuatan ummah dalam era pembangunan sekarang, katanya. --BERNAMA

ARA oba